



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim tir_yimyim

tir yimyim TAPAK 3

Russia nunger ketdangsür tejen kati Syria semdangsi

Arvind Kejriwal-i PM Modi nem takhangba ka agütsü



VOL. XXII ISSUE NO. 105 (ADOK 105) DIMAPUR RASEMNÜ (WEDNESDAY) AENJETI (JANUARY) 29, 2025 ₹ 5.00

T.R. Zeliang-i NHIDCL den senden amen

Dimapur, January 28, 2025 (TYO): Deputy Chief Minister T.R. Zeliang-i January 28, 2025 nü NHIDCL den senden ka menogo aser idangji NHIDCL ajanga Nagaland nung mapatong balala inyakba meyipa reprangshi aser onüktem benoka lemsatsep.

T.R. Zeliang ya Planning & Transformation aser National Highway Minister Incharge lir. Iba senden nung Chumukedim, Phek aser Meluri Deputy Commissioner tem, DC Office Peren nungi ADC Jalukie aser DC Office Kohima nungi Revenue Officer nunger aden.

Tanü onük 19 benoka lemsatsepba nungi 15 ji Land Acquisition dak sendakba liasü aser iba atema Deputy Chief Minister-i pei pei District Administration ajanga February ita tsüingda ken o tem angatetteptsü aser action taken report agütsütsü tetuyuba agüja liasü.

Tang ya mapa inyaksü mongpu tongtipang lir aser kobi melii tzungluruwa atongsü ta TR Zeliang-i ashi.

Paisa District Administration dang GBs aser Village Council Chairman teyari agia ali dak sendakba ken o tem angatetteptsü metetdaksü.

Dimapur-Kohima 4-Lane road nung slope protection measures nung temulung masür ta TR Zeliang-i ashi.

Iba dak sendakba nung contractor M/s Maccaferri-i

RoW dak sendakba nung tebilemstü kar kechiyong NHIDCL office ket nung 2013-14 nung agütsüba mezüing RoW record mali ta langzü.

Idangji Dy. CM TR Zeliang-i NHIDCL dang NHAH office den tongteptsü kechiyong Nagaland-i NHIDCL marudang NHAH-i liasü ta tetuyuba agütsü.

Ali kiburtem nem damage compensation agütsür sernung contractors nem mapa meinyakdaksüba atema District Administration-i final notice ka agütsütsü Zeliang-i tetuyuba agütsü.

Iba notice period tembangba sülen contractor nem RoW tejangja ka agütsür mapa inyakdaksüba ta paisa ashi.

Nisung kar mechi nung nisung teimba timmetemdaksütsüla kechiyong state renlokstü atema road connectivity tajung nungdaker ta TR Zeliang-isa ashi.

Tanü senden nung Peren-Dimapur- Pkg-II & V, Dimaipur-Kohima-Pkg-I, II & III, Kohima Bypass- Pkg- I, II, III & IV, Kohima-Jessami-Pkg-II, III, IV & V, Akhegwo nungi Avangkhu - Pkg-I & II indang onüktem benoka lemsatsep.

Deputy Chief Minister-isa ED (P) Kohima dang tekaratiba nung NHIDCL kübok National Highways sema senzütsü atema sentong renemstü metetdaksü.

Land Resources Department-i Khezhakeno semdang

Khezhakeno (Phek), January 28, 2025 (TYO): Phek district kübok Naga nunger alemli aliba yimtsüing Khezhakeno nung Land Resources Department-i community mobilisation programme ka agiogo.

Prime Minister Krishi Sinchayee Yojana - Watershed Development Component (PMKSY-WDC) 2.0 kübok Department-i iba sentong agi.

Village Council Hall, Khezhakeno nung agiba sentong nung Land Resources Department Advisor G. Ikuto Zhimomi-i tetushi süa jaoker ka ama shilem agia liasü.

"Küm noklang aika tejakdang Khezhakeno yimtsüing nungi Naga nunger prokshi aser tesem balala nung yimtsüingtem kümteta ao aser oshi balala jemi ta putiotsü ajanga ashir" ta Ikuto Zhimomi-i ashi.

Naga nunger pei pei kin aser oshitem balala süaka asenok ka dang aser Naga nunger ka dang ta asüba tangatetba ya teti alitsüla, ta pai ashi.

"Naga nunger ka ama asenok kati ka anema raraba anentsüla

aser meputep kecha malitsüla" ta Advisor Ikuto-i ashi.

"Oboula nunger sorkar shinga kübok maliasü saka parnoki liteta aru. Tanü tensa melenshiba aser yimtsüingtem tejakleni aoba ajanga asenoki sorkar teyari nungdaker. Yimtsüing nung alirtem akangakanga noktaksüla aser sorkar nungi teyari maneni agitsüla. Chief Minister Neiphiu Rio lenisüba kübok terenlok aser tejakleni aotsü atema sorkar pusemstüla" ta paisa ayongzük.

LRD-i Khezhakeno nung watershed aser spring shed projects balala inyaksü ta paisa shisem.

"District Project Officer Phek kübok mapatongtem temulung agüja inyaksü" ta LRD Director Albert Ngullie-ia ashi.

"Department-i iba yimtsüing nung rongsenketzüing tsütsü temelenshi bener arunür aser Khezhakeno o temeket aliba yimtsüingtem nung coffee plantations amala mapa inyaknür. Iba ajanga coffee experiential tourism nung yaritsü" ta Albert Ngullie-isa ashi.

District Jail, Dimapur nung puoka ayurtem atema fuel station ka lapok



January 28, 2025 nü Prisons and Printing & Stationery Advisor Er. Kropol Vitsu-i M/S Ummeed Prison Welfare Service Station indang nungshilung sayatsüba angur.

Dimapur, January 28, 2025 (TYO): January 28, 2025 nü District Jail, Dimapur nung M/S Ummeed Prison Welfare Service Station lapokogo aser iba ajanga prison reform aser inmate rehabilitation nung tongtipang alizüing ka tongtetogo.

Iba petrol pump ya prison staff ketdangsüba kübok tepuokdak nungi chiokstü mapang tonger alirtem nem mapa achayangdaksür. Iba mapa ya Prison Department, Nagaland aser Indian Oil Corporation Limited (IOCL) tsüingda amalitepa tenzükogo.

IOCL nung corporate social responsibility (CSR) program kübok iba mapa ya inyaker.

Tanü Prisons and Printing & Stationery Advisor Er. Kropol Vitsu-i tetushi süa jaoker ka ama nungshilung sayatsü.

"Iba service station ya shishilembaba mapa ka dang masü saka tepuokdak ayurtem asoshi teimla, skill development agütsüba den parnok loktiliba den sendaktepba tamaitstü lir" ta Vitsu-i ashi.

Iba mapatong nung yariteper ajak nem tenüingsang agütsür. Iba mapa ya shishilembaba dang masü saka tepuokdak ayurtem lokti aser rongsenketzüing nung tashi itdaksüba lir, ta paisa ashi.

Iba mapatong ya tepuokdak ayurtem skill development, self-reliance, aser confidence ajungkettsü atema alizüing yur

tenzükba liasü ta Vitsu-isa shisem.

Iba service station nungi aazükba sen ajanga prison welfare programs nung yaritsü. Iba nung vocational training aser education densema lir, ta paisa metetdaksü.

"Chief Minister, Neiphiu Rio lenisüba kübok iba mapatong inyaktetogo. Nagaland nung iba mapatong tenzükba ya India nung prison reforms tenzükur mezüingpur rongnung densemogo. Madhya Pradesh aser Telangana nung iba mesükba maparen tenzükba lir" ta Advisor Er. Kropol Vitsu-isa ashi.

Prison staff aser sendaktepa alir ajaki iba service station takok ngua aotsü atema yariteptsü aser amalitep alitsü ayongzükur ta paisa ashi.

"Nagaland prison system sasep nung inyakyim tasen kar aser pei sasa noktaktetsü mapa kar inyaksü tejangraba liasü" ta Nagaland DGP, Rupin Sharma, IPS-i ashi.

Iba mapa ya Central Jail, Dimapur nunga inyaksü atema jembitepdar. Iba ajanga prison system nung temelenshi tulu ka bentsür arur aser tepuokdak ayurtem rehabilitation aser skill development nung temulung agütsür, ta pai ashi.

"Iba petrol pump ya shishilembaba maparen ka dang masü saka tepuokdak ayurtem nem mapa inyaksü

angazükdaksüba den skills sayutsü atema lir. Indian Oil Corporation-i pusema nungitba aser Chief Minister, Neiphiu Rio lenisüba ajanga iba mapatong takok ngua tenzükur" ta Rupin Sharma-isa ashi.

Iba inyakyim ajanga tanga prisons ajungmesotsü aser rehabilitation ajungkettsü imlar, ta paisa shisem.

"Iba ya CSR-driven impact lir" ta Senior Manager (Retail Sales), Dimapur RDA, aser IDCL Divisional Retail Sales Head, Tinsukia Division K.T. Gange-i ashi.

Iba fuel station ya December 23, 2024 nungi lapok aser 8 nozzles den 12,000 liters fuel capacity lir. Tang tashi nung totzü litre 17,900 tashi yokogo.

Iba fuel station ya trained inmates 9-i anepalur aser senotsü aazükbaji prison welfare activities nung amshitsü aser mapa inyaker nem-a taa dalang agütsütsü.

DGP Rupin Sharma-i prison balala sema senzüba sülen iba mapa tenzüktsü ajungshi aser prison staff-i olemtepba sülen mapatong tenzük.

Tanü agiba sentong nung District Jail Dimapur jailor Dozhoyi Cukhamu menden liasü, Inspector General of Prisons, Nagaland Imtiangshi Ao, NJS-i mapatong osang lemsatsep aser Office Superintendent, Prison HQ Zasiemenou Metha-i anküp tepela o jemi.

MMC nung Government Nominees-tem tenangzükba agiogo

Mokokchung, Aenjeti/ January 28(TYO): Tanu Additional Deputy Commissioner, Mokokchung office nung Mokokchung Municipal Council nung Government Nominees parnok Councilor züngsem 6 tenangzükba sentong agiogo.

Mokokchung, Additional Deputy Commissioner & Chief Executive Officer Mokokchung Municipal Council-i Mokokchung Municipal Council asoshi Government Nominee

Councilor par trok(6) Wb. M. B. Endangnüks hi Longkumer, Wb. Toshiakum Jamir, Wt. Wapangnaro Pongen, Wb. T. Lima Ao, Wb. Hemant Rai aser Wb. Tsükti Longkumer parnok tenangzükba züngdakja meyonngem agidaksüogo.

Mokokchung Additional Deputy Commissioner & Chief Executive Officer Mokokchung Municipal Council(MMC) Wb. Chumlamu Humtsoe-i parnok tenangzükba agiba mapang nung parnok dang tang

MMC nung elected züngsemtemji lanur teyakyak mangdang akar tesa lirta temelung chia alidang ano Government Nominees züngsemtema taoba mapang Mokokchung Town Committee aser Mokokchung Municipal Council nung inyakdanga alir aser ano lokti balala nung inyaker nübo tajung aitdang MMC nung temelenshi tulu adoka Mokokchung ajungkettsü tamang akarta parnok den shisa lemsa-a ayongzükba jembia liasü. (Maneni tapak 2 nung...)

DMC aser EDTC züngsem tasentem tenangzüktep agiogo



Deputy Commissioner, Dimapur, Dr. Tinojongshi Chang, NCS den ketdangsürtem DMC & EDTC züngsem tasentem tenangzüktep agiba sentong ka Deputy Commissioner, Dimapur indang Conference Hall nung January 28, 2025 nü alidang tangokba noksa nung angur.

Dimapur, Aenjeti/January 28 (TYO): Dimapur Municipal Council (DMC) aser East Dimapur Town Council (EDTC) nung züngsem tasen sorkari shima alirtem tenangzüktep agiba sentong ka January 28, 2025 nü Deputy Commissioner, Dimapur indang office nung agia liasü.

Iba sentong ya Nagaland Municipal Act 2023 indang Section 60 A(1) aser (2) nung shia aliba ama agia liasü.

Sentong nung Deputy Commissioner, Dimapur, Dr. Tinojongshi Chang-i züngsem tasentem nem tenüngsang

agiüsü. "Iba mapang asangsang nung mapa kuma inyaktsü atema küm 20 dak tema agiogo. Nagaland sorkar aser Dimapur nung aliba nüburtem teyari nung asenoki iba alizüng tongtet," ta DC Dimapur ajanga ashi.

Dr. Chang-isa nüburtem nüngdakba peritsütsü aser Dimapur district nung temelenshi aser terenlok bener arutsütsü asoshi züngsem ajaki telungjem nung meranga inyaktsü kanga tongtipang lir ta ashi.

"Züngsem ajak lungjema alitsü aser pei mapa bendanga

agiüsü inyaktsü ajungshir. Ka ama lungjemer inyakba ajanga dang dimapur jurisdiction kübok lenla ajak nung terenlok alitsü," ta pai ashi.

Iba sentong ya Dimapur aser East Dimapur asoshi tongtipang mapang ka liasü, kechiaser local bodies temi district nung nüburtem takum melenshitsuüsü nükjidong nung ki o jen tajungba kuma melenshitsuüsü asoshi rangloker mera agiba mapang lir.

Iba sentong ya ajanga region nung terenlok aser yimchiyimjung tendak tasen ka tenzüksü temlungtetba aser teima asendenshia liasü.

MMC nung Government Nominees-tem...

(TAPAK 1 NUNGI...)



Tanu Additional Deputy Commissioner, Mokochung office nung Mokochung Municipal Council nung Government Nominees parnok Councilor züngsem 6 tenangzükba sentong agir kelen Additional Deputy Commissioner & Chief Executive Officer, MMC Wb. Chumlamso Humtsoe (abelen nungi pezübuba) den külemi tangokba noksa.

Tanu putu nung nüburtemi lenirtem dak tamang mekateter saka asenok külemi longjemer nübur asoshi inyakdang nüburi tamang katettsüsa inyaktsü nüngtaker, Mokochung-ji tejakleni aoba aser tangar nükrangdong ka südaktsütsü asenok külemi inyakba mapang Mokochung asoshi mangdang yur inyakdita ADC Chumlamso-isa tasen aiter MMC Councilors Nominee-tem den ajungshitepa jembia liasü.

Mokokchung Municipal

Council nung Government Nominees parnok Councilor züngsem 6 pur ya nübo tetemsü tesa lir.

Wb.M.Bendangnükshi Longkumer ya taoba mapang Mokochung Town Committee (MTC) nung Deputy Commissioner Chairman sür alidang pa Vice Chairman 1973 nungi 1981 tashi inyak ano MTC inakyim melenshir aoba nung pa mezüngbuba Town Chairman 1982 nungi 1984 tashi inyak.

Wb.Toshiakum Jamir ya

yimden, lanur aser kaketshir telok balala aser ano lokti balala nung shisalen sayur lenir tajung ka lir.

Wt.Wapangnaro Pongen ya tesayur ka lir aser la Jubilee Memorial School nung küm 20 tashi inyakdang Vice Principal inyakba nübu lir. Wb. Wb.T.Lima Ao ya 1995 nungi 2005 tashi MTC nung member ka ama inyak. Wb.Hemant Rai ya Advocate ka lir. Wb.Tsükti Longkumer tang Mokochung Chamber of Commerce & Industry President teinyakdak lir.

Kohima nung 13 Assam Rifles firing exercise alitsü

Dimapur, Aenjeti/January 28 (TYO): Deputy Commissioner, Kohima ajanga nüburtem dang sangdong ka agütsüba nung, Kohima nung aliba 13 Assam Rifles pur February 1-28, 2025 anogotem Firing Range, Kohima Garrison nung small arms firing exercise agitsü, ta metetdaksü.

Anungji Kohima jila kübok yimtsü, ward ketdangsür aser Panchayats tem dang iba mapang Firing Range telungi maitsü mesüra shiruru anir maotsü ayongzüker, ta sangdong ajanga ashi,

Iba sangdong ya nüburtem lendong timtem nungi jenbua alitsü mechi agütsür.

Agniveervayu Intake 01/2026 mapang atsülanger

Dimapur, Aenjeti/January 28 (TYO): Wing Commander, Commanding Officer, 11 Airmen Selection Centre, BS Rathore ajanga sangdong ka nung ashiba agi, Employment News nung December 28, 2024 nü adoktsüba recruitment advertisement number DAVP/

10803/11/0011/2425 indang Agniveervayu Intak 01/2026 atema online registration ya February 2, 2025 (2300 Hr) tashi atsülangshiogo.

Advertisement nung tanüngba temetetsü ajak kasa alitsü, ta sangdong ajangasa ashi.

Noklak nung awareness aser tenük reprangba camp ayongzük



Dimapur, Aenjeti/January 28 (TYO): Deputy Commissioner, Noklak indang Conference Hall nung January 28, 2025 nü Awareness programme on Road Safety cum Free Eye check-up camp ayongzüka liasü.

Deputy Commissioner, Noklak, Arikumba ajanga tayongzükba o tatsüka jembidang, district nung lenmang mejungi liaka gari anirtemi kasa lenmang amshir dangartem akumtsübo mesüi tapi agi gari anishir, ta ashi.

Lendong nungi jenbuttsü mechi driver temi gari kanga kera manitsüla, traffic oziung ajak nung tashi angatsüla, gari anidang teti saksalema alitsüla, teraksatsüba oset mamshitsüla, ta pai ashi.

DC Noklak-isa sentong nung adenertem dang gari junga anepalua ayutsü ayongzük aser gari lendong ajuruba ya timbaka gari nung anepalu masüba nungi adoker ta ashi.

SDO (Civil) Noklak, Vikhoto Richa-i Good Samaritan Scheme aser Hit & Run Compensation Scheme indang onük nung jembia liasü.

Pai ashiba agi, Ministry of Road Transport & Highways ajanga semzükba Good Samaritan Scheme ya gari lendong ajurur alirtem metsüboi yaritsü asoshi nüburtem ajungmesotsü atema tenzük. Iba yagi lenmang tezülen alirtem gari lendong mapang yariteptsü asoshi ajungmesotsü nükjidong nung lir, ta pai ashi.

Vikhoto Richa-isa Hit & Run Compensation Scheme indanga jembia aser iba scheme

yagi hit & run accident nung timtem ajurur alir nem teyari senotsü agütsür aser iba scheme ya Motor Vehicle Act nung shilem ka lir ta ashi.

EAC Noklak, Menlom Phom-i 'Road Safety' indang presentation agütsüdang, lenmang amshir ya lenmang amshiba nisung mashi ka lir aser yangji tetsüng agi senzürtem, cyclists, motorcyclist, gari nung mena aliba passenger tem aser nüburi amshiba lenmang nung senzüba nisung mashi dena lir, ta ashi.

Paisa gari lendong mapang asü-ama nungi jenbuttsü mechi Seat belt aser Helmets amshitsüba indanga lemsatapa liasü.

DEF Noklak nungi constable P. Khaikho Khiam-i Motor Vehicle Act indang tejangjaba nung rateta ashi aser signal light amshiyim, side glass, no parking zone amshiba aser gari aniba mapang tsüngsem asemtsüba indang yimyatem sayua liasü.

Iba sentong nung EAC Noklak, Apuloka H Sumi menden liasü aser EAC Noklak, Bangjunglemba ajanga melepzüng o jembia liasü.

Iba sentong tembangba sülen Deputy Commissioner, Noklak indang Conference Hall nung Free Eye Check-up Camp ka Chief Medical Officer cum MS Noklak, Dr. Victor. NC aser Medical Officer, Dr. Chongya nati anir agia liasü.

Awareness sentong nungya District Road Safety Committee members, Mobile & Drivers' Union Noklak, Government drivers aser All Ward Union Noklak nungi dena liasü.

NAGALAND POLLUTION CONTROL BOARD
 Signal Point, Dimapur – 797112, Nagaland
 Tel.: 03862-245727, TeleFax: 03862-245728
 Website: www.npcb.nagaland.gov.in e-mail: npcb2@yahoo.com

AMBIENT AIR QUALITY FOR KOHIMA AND DIMAPUR CITY
KOHIMA ASER DIMAPUR NUNG MOPUNG MERÜK-MEMERÜKBA JENJANG

| Sl. no | City | Location of air station | Type of area | Monitoring dates | | Permissible limit As per the National Ambient Air Quality Standards "Iba tasazük alemabo metudaktsütsüla" |
|--------|---------|----------------------------|--------------|------------------|------------|--|
| | | | | 21.01.2025 | 23.01.2025 | |
| 1 | Dimapur | Bank Colony | Residential | 164 | 193 | 100 µg/m ³ |
| 2 | | Dhobinala | Commercial | 246 | 241 | |
| 3 | | NPCB Office, Signal Colony | Residential | 161 | 179 | |
| 4 | | Tenyiphe, Chumoukedima | Commercial | 140 | 125 | |
| 5 | | Nagarjan | Residential | 164 | 183 | |
| 6 | | Viola colony | Residential | 133 | 158 | |
| 7 | | Burma camp | Commercial | 211 | 236 | |
| 8 | Kohima | Opposite NST Office | Residential | 63 | 73 | |
| 9 | | PWD Junction | Commercial | 120 | 106 | |
| 10 | | High School Junction | Commercial | 148 | 141 | |
| 11 | | Midland (Upper) | Residential | 94 | 101 | |

Iba osang ya nübortem ajangzüksü atema Nagaland Pollution Control Board-i agütsür.



Uttar Pradesh kübok Baghpat district nung Jain community sentong ka agiba mapang süng agi yangluba structure ka chireper aliba noksa nung angur. Iba lendong nung nisung tenet asü aser nisung 60 yirua liasü.

Indo-Bangla arrtsü atsü atema Bengal cabinet-i temelaba agütsü

Kolkata, Aenjeti/January 28 (Agencies): West Bengal Cabinet-i, Nadia district kübok Karimpur nung India-Bangladesh arrtsü atsü atsütsü asoshi Border Security Force (BSF) atema ali alizüktsü asoshi temelaba agütsüogo.

Iba tesem nung barbed wire agi atsü atsüba atema aser aluyimertem tsüngda arrtsü adener mangatettep adoka arudar.

“Cabinet-i Hombarnü temelaba agütsüogo. District-level committee ajanga ali yakta alizük tenzüktsü. Onoki yakta committee nem senotsü agütsütsü atema Union home ministry nem osang agütsütsü,” ta ketdangsür kati ashi.

West Bengal aser Bangladesh na arrtsü km 2,216 lir. Arrtsü nung tesem kar tang tashi atsü matsü lir, aser item tesemtem ajanga nüburtem

ozüing alema senzütepba den shibelenertem asoshi lenmang tajung kümogo.

BSF ketdangsür kati ashiba agi, atsü atsüba ajanga arrtsü nung ozüing alema inyaksangshiba tajemba kümdaktsüogo. “Atsü atsüba ajanga linük anaprongla nem arrtsü adena ozüing alema inyaksangshiba maparen nokdangtsü asoshi teyari agütsütsü,” ta ketdangsür yagi ashi.

BSF-i Hokolbarnü ashiba agi, parnoki Nadia district nung arrtsü nungi km ana majung tsüngda ali telung nung chamber asem ngutetogo aser Bangladesh-i shibelener aotsü aliba phensedyl cough syrup puogo.

Kasa mapang nung West Bengal yimsüsü süa aliba Trinamool Congress puri arrtsü nung atsü atsütsü atema ali

malizüki national security lendongbang nung toktsüba atema Bharatiya Janata Party (BJP)-i parnoki aitsüogo.

TMC otongdar Jay Prakash Majumdar-i ashiba agi, West Bengal nung BJP party-i kodanga sorkar mekümtettsü aser takoktsü dang süra par party-i state ajunga ya BSF nem agütsü. “Arrtsü kümzüka ayutsü ya BSF khuret lir. Ali kar maliba ajanga BSF-i arrtsü azüoka meyteter süra parnoki onok dang ashitsüla. Onoki achaayangtsü,” ta otogdari ashi.

West Bengal chief minister Mamata Banerjee-i, arrtsü nung yimdaklirtem amokmerenba atema BSF aitsüogo. 2021 küm assembly election agitsü lia BSF-i yimdaklirtem amokmerenba atema TMC-i Election Commission of India nem tashishiba ka agüja liasü. BSF-i iba taitüsüba ya magizük.

Bhagirath Manjhi Congress nung denogo

New Delhi, Aenjeti/January 28 (Agencies): Dashrath Manjhi shiba dang ‘Mountain Man’ of Bihar ta ajar par jabaso Bhagirath Manjhi Brehostibarnü Congress nung denogo. Manjhi ya kasa anogo Congress nung adenba lenir pongu rongnung ka liasü.

Taoba Aam Aadmi Party (AAP) otongdar Nishant Anand, taoba Bharatiya Janata Party (BJP) otongdar Nighat Abbas, taoba Director General of Health Services (DGHS), Dr Jagdish Prasad, kaket zülur aser osangbener Frank Huzur aser Bihar nung All India Prajapati Kumbhar Sangh state tir Manoj Prajapati nungera Congress nung denogo.

Parnok Congress party nung adenba sentong ya New Delhi nung All India Congress Committee (AICC) headquarters nung agia liasü.

Party nung adenba sülen Nighat-i, lokti kar nungi züngsemtem züngtokba atema BJP aija liasü.

“BJP indang tetsübuttsü politics aser fanaticism anendaktsütsü mapang tongogo,” ta lai ashi.

“Tanü yimong nung senzüba Muslim nunger ajak tetsübu nung dang senzür aser ibayongji ni BJP toktsür Congress nung

denogo. Idakibo BJP nung ama TV nung sensaksem magi tsüngda Muslim nunger anema jembiba kodaser viral akümtsü iba indang kecha mashir,” ta lai shisem.

Kasa mapang nung AAP toktsüba indang jembiba mapang Nishant-i pa kuli lemsatempa liasü.

“AAP nung adenba mapang onoki Kejriwal-i teyazü jembiba aika meimshitsüsa aküm, kong Yamuna merektettsüba, school 500 lapoktsüba aser Delhi ya pollution-free kümdaktsütsü nangzükba densema lir. Ajisüaka pai item mapatem ya ka danga tembanga minyak,” ta pai ashi.

Ali Anwar Ansari-i ashiba agi, Constitution dak sendakba nung conference aika nung shilem agiba sülen pa Congress nung adentsü ajungmesoa liasü.

“Rahul Gandhi tebilemdangba ajanga Bihar nung Dalits, backward class, tribal aser minority tem kanga jangrabangra kümdaktsüogo. Onok ajaki Congress Party tebilemba agizüker aser külemi tejakleni aotsü,” ta pai ashi.

February 5 nung Delhi nung aser küm tatemlen Bihar nung assembly election agitsü lia tang item lenirtem ya Congress nung denogo.

Arvind Kejriwal-i PM Modi nem takhangba ka agütsü



New Delhi, Aenjeti/January 28 (Agencies): Delhi Assembly elections agitsü lia, AAP tekolakba Arvind Kejriwal-i, Ato Kilonser Narendra Modi dang linük ajunga nung billionaires tem nem loan balala atema taitok agütsüba agina ozüing ka benoktsü takhangba agütsüogo.

M o n g o l b a r n ü osangbenertem den sensaksemba mapang Kejriwal-i, takartem dang sen crore meyirejang aika alang corporate loan tem tai atokba atema centre sorkar aitsüogo. Paisa, iba amala inyakyim ajanga tanungba nüburtem saru balala timba kümdakja kureta kümdaktsür aser kasa mapang nung takartem ajangzükdaksür.

“Nüburtem parnok indang itasen tesadang saru agütsür aser kasa mapang takartem indang loan tai atoker. Kechiba

centre sorkari nüburtem indang home loans, car loans, aser tanga senotsü khrertem magintsür,” ta Kejriwal-i asüngdang.

Paisa, billionaire tem dang loan tai atokba anenba ajanga income tax aser GST rate tesadang agi tajemba kümdaktsütsü, taxable income limit anasü agi timba aser tenüngdakba osettem nungi GST agintsü atema sorkar nem teyari agütsütsü, ta ashi.

“Iba ya ochimashi inyakyim tulu ka aser anendaktsütsü mapang tongogo,” ta pai ashi.

Delhi Assembly elections ya February 5 nü agitsü aser result February 8 nü sangdongtsü.

Kejriwal taküm agi term asem buba atonga CM akümtsü asoshi merangdar. AAP puri 2020 küm tatesa Delhi election nung menden 70 nungi 62 koka liasü.

Parliament Budget session Jan 31 nü tenzüktsü

New Delhi, Aenjeti/January 28 (Agencies): Tir Droupadi Murmu-i January 31 nü Budget session tenzükba mapang Parliament House anaprongla nung o jembitsü aser finance minister Nirmala Sitharaman-i February 1 nü Union Budget 2025 benoktsü imlar.

Parliament Budget session mezüngbuba shilem January 31 nü tenzüktsü aser February 13 nü tembangtsü. Session tanabuba shilem ya March 10 nü tenzüktsü aser April 4 nü tembangtsü.

Mongolbarnü sayaba parliamentary bulletin nung, tir-

i o jembiba sülen ghonda tesadang ka lir Rajya Sabha nung Government Business transaction atema senden balaka amentsü, ta shia lir.

February 3-5 ya tir osang dak sendakba nung sensak asemtsü atema lezmükja lir, koba MP kati benoka tanga kati oshidang agüja agizüktsü.

Union parliamentary affairs minister, Kiren Rijju-ia Hombarnü sangdong ka ajanga, taruba parliament senden takok ngua agitsü atema opposition lenirtem den angatettepba inyaktü asoshi sorkari January 30 nü party ajak senden ka

amentsü ayongzükba metetdaksüogo.

January 23 nü finance minister Nirmala Sitharaman Halwa ceremony nung shilem agiogo, koba budget renemba inyakyim tatembangbuba aser Union Budget 2025-26 menüngba inyakyim ka lir. Sitharaman-i Budget ya Parliament nung February 1 nü 11 ako nung metetdaksütsü.

Union Budget 2025 dnsema Sitharaman-i tang agi tibenbuba Union Budget metetdaksütsü. La ya union budget tibenbuba atonga metetdaksüba Finance Minister mezüngbuba kümogo.



New Delhi nung Assembly election magi tsüngda roadshow ka nung Punjab Chief minister aser AAP lenir Bhagwant-i shilem agiba noksa nung angur.



TIR YIMYIM YIMOBILEM (EDITORIAL)

DIMAPUR RASEMNÜ, JANUARY (AENJETI) 29, 2025

Yimjung dangbo Ochi tongtibangba

Taoba mapang Nagaland government yimyim ka " Terenlok asoshi Yimjung aser Yimjung asoshi Terenlok" ta ayimtena nübortem den jembiba angashiogo aser, ashiko tanga kasa yimyimji maneni ayimdar asütsüa akok. Aji oda, metsütsüi nübortemi sarasademba aser government-i ayimtenba ola Tsüngremi angashia, Nagaland nung yimjung mapang ka bentsür aruogo. Atangji, Nagaland nung Naga yimten nüchiso bushir telok balala aika kumadoker Naga yimten tebilemstü mekoktetba ajanga tebilemstübo anogo shia ajurur, ajisüaka iba jagi Nagaland nung yimjung mali tabo meshitet. Yimjung ya tebilemstü maliba lima dang ajar masü saka tebilemstü aliyonga kija aser lokti mapa shitak inyaka otettsüsa tensa tia tipdema lira, ibaji yimjung lima asütsü. Ibaji kodang bilemdangdir, tang mapang ya Nagaland nung terenlok asoshi yimjung nungdaker süra, terenlok mapa inyaksü mapang tajungji tang ya asütsü. Ajisüaka, Nagaland nung ya yimjung aliyonga terenlok mapa inyaka aoba kecha balaka mereprangteter. Iba jagi Nagaland nungbo yimjung ya jenjang makaba oset ka amai kumogo, kechiyong yimjung aliyonga Naga yimten tebilemstüa koka telatetba kati maruteter aser terenlok mapatema meinyakteter. Aji oda, yimjung ajanga Nagaland nungbo tajung meinyakteter süra kechi agiang Nagaland ajungtsü aser Nagaland nung terenlok mapatem koka inyaka otettsü (?) ta asübaji government nung alirtemi anir nütsüng nübör ajaki bilemdangtsü kanga nungdaka kumogo. Atangji, alima nung yimjung aliyonga nübortem asoshi tajung meinyaktetba timtem aser kuliji, tanga masü, ochi maliba ajanga lir. Anungji, terenlok asoshibo yimjung dang nungibo ochisa tenügdaktiba aser tongtibangtiba lir. Tanü Nagaland nung yimjung aliba yagibo sademsadema auyatsü aser ochimashi mapa inyaksü lenmang lapoktsü amai dang kumogo. Aji oda, yimjung mapang asünungji, tetsübu aser tarendak mali ochimashi mapa inyaker aser terenlok mapatem inyaksüba sen agi pei sen kümer agiadokba agi nübortem asoshi kanga nungdakba tongtibang mapatem merenemtet toktsüba aika lir. Ano, talisa Nagaland nung alirtem asoshi tang ama yimjung mapang takoksa angubaji ochimashi inyakerkem o ochimashi mapatem bushisüngdang na tsüngda dena yimjung aliba agi, ochimashi mapa inyakaka tebusir mali, ochimashi mapa meinyakerkemang takoksa ta asütsüsa yimjung mapang tamajung ka asenoki yanglutetogo. Joko, asen lima ya shitakba yimjung nung tangar mesüka terenlok lima kümer linüra, asenok nisung shiai mapa tilateri nung dena ochishia inyakba sobaliba ka tenzüksüla. Asenok dak ochi mali tashibo yimjung aliyonga yimjungji ochimashi mapang tuluba inyaksü asoshi lapoktsü amai kumadoktsü aser tangari asenok nem terenlok mapa inyaksü asoshi sen crore meyirijangsa aika agütsüyonga, asenok dak ochi melira, iba ama sen jagi inyakba mong kecha maka ser samatsü. Joko, iba amaji Nagaland nung ochi manguba wara agi atong nungji, asenok rongnunga koba shitak aser koba meshitak meshitetsüsa ochi o tiyazü na meyoktepadokogo. Ibaji mebendang tashi asenok asoshibo terenlok mapa inyaksüba sentongtem ajak ya taila aser tiyazü dang asütsü. Joko, asenok ya tiyazü lima nung ojang alitsüla, iba ochimashiba lima aser ochimashi agi yangerba tesemtem nung jagi asenok pilatsüla. Aji oda, state government yimyim dena melena 'Terenlok asoshi Yimjung aser Yimjung asoshi Terenlok' ta ayima alibaji 'Terenlok asoshi Ochi aser Ochi asoshi Terenlok' ta melener ayim tenzüksüla. Tapu tapu sentong atongaka aser senotsüa perir anüngtsüsa aliyonga asenok dak Ochi melira, yimjung aliyonga aser nütsüng nebo aika aliyonga asen lima nung ayi meyitsü, auyi apongtsü, lishi agi asüngtsü aser lanurtemi meinyaki chiyongba telok balala kümyonga aotsü. Ochi yabo küm pungo sentong nung enokdi ta jembitsüba o ka masü mesüra küm tatem nung reprangdi ta asütsüba onüka masü, ibaibo tang tebilemtet dang aser tereprangtet dang tsükaronga benshi tenzüksüba o aser mapa lir.

OLEMSABANG

MUNGDANG ASER AROGO TESENDAKTEP ASER TEPILA

- L. Kika Pongener.

Kodang yimtsüng aser jila kar nung tamanger kar temulong meyipa Yisu Khrista agizüka tzü nung tzüsendir, item tamangertemji longjemer lim arogo ka tenüng jateta tenzüka aor. Ano kodang yim tasen aser jila tasen kar mesema oa tamanger kar longjema adenshidir, idakji külemi tamang ka ser longjema alitsü atema lim arogo ka tenüng jateta tenzüka aor. Ano kodang lim arogo aika küma odir, item arogotemji tamang nung liromedema telongjem ka nung kati ka den sendaktepa alitsü atema mungdang ka tenüng jateta tenzüka aor. Ano lim arogotem ajungaji tamangbaren nung liromedema aotsü, arogo yimden yimsusuba, nutsüngsuba, ketdangsuba, tenyaba mapa aser tanela anir aruba mapa, item ajak nung liromedema aotsü atema 'Inyakyim-Lenniba' (Guide-Line) ka lateta yur, iba nungji amendaker lim arogo ajunga külemi liromedema inyaka aor. Küm shia küm tatem nung lim arogotem shia nungi teshimtet nubu (Delegates) sentepa inti mongdang lia, teinyaktsü mapatong aser sentongtem ajak bangzünga lemteter. Aji oda, tang shiyunga aruba mapatem nungjagi mungdang aser lim arogotem tsüngda nung kati ka den sendaktepa aliba indang küli kar angur.

Anungji asenok ajaki metet, arogo aser mungdang ya tanga alima yimden bangdak aser loktiliba den khenyongi inyakyim balaka lir. Alima yimden bangdak aser loktiliba nungpo temzüng-ozüng tesashi agi azüoka anir aser tashi mangartem/aibelenertem dak tenarong mesuka senchi-menji achir aser karbo lokti nungia jentoker. Ajisuaka, arogo aser mungdang nungpo iba ama temzüng-ozüng tesashi agi azüoktsü, alentsü aser merenshitsübaji mapet ta angateter. Arogo aser mungdang liromedema anitsü atema 'Inyakyim-Lenniba (Guide-Line) ka lateta ayur. Ajisuaka, arogo aser mungdang lennitsü atema tzüzüng-ozüng shitakbajibo Laishiba tesayuba/tetuyuba dang asütsü sudi. Anungji arogo aser mungdang inyakyim nungpo....Tashi mangara/hai-haura makara amaalitep malitsü ta asüba.... Iba mesukba temzüng-ozüng tesashi yabo mebenshitsüla-a ta bilemer. Aji oda, amaalitep malitsü ta asüba olenji kodang tanga olen ka agi angatetdir 'jentoktsü' ta asüba den kecha tepila mali asütsü. Iba amala temzüng-ozüng tesashi-jibo tamangba yimsu dak sendakba lokti ka denbo kanga-sa mapet amai bilemer. Asen sobaliba nung yimdak nungi aritokba aser lokti nungi jentokba dak temaba temerenshibo malitsü amai bilemer. Arogo nung züngsem kari nuktapangda-a aibelenra aser ashi-auya mapa kar inyakra arogo nungi mapang tatsüka atema tenüng agiena atar....ajibo tim. Ajisuaka, amaalitep malitsü, tesendaktep pilatsü mesura jentoktsü ta asüba temerenshi-jibo tamanger mungdang lokti nungpo kanga-sa mapet amai bilemer.

Asenoki kodang mungdang aser arogo tesendaktep aser tepila indang arok-aroka shisadangdir, lim arogo kaji Yisu Khrista agizüka temulong meyipa tzü nung tzüsenertem longjemba agi akümer aser ano mungdangji lim arogotem longjemba agi akümer. Anungji arogopurtem melira aser medeni lim arogo kaji alitsü makok. Ano lim arogotem melira aser medeni mungdang kaji alitsü makok. Mungdang ka arakzüa taküm lidaktsütsü atema lim arogotemi saru-molok (Budget) agutsür, ibajagi mungdangji mesua taküm alir. Aji oda, khen tongmelang agi angatetsübo mungdangji lim arogotem madak temaba sabang....Saka lim arogotem ya pei pei temeden akaba arogo ka-ka lir. Shitakba kanga junga bilemdangra, mungdangji maliyongjia lim arogo-ji litettsü....Saka lim arogotem melira aser medeni mungdang-jibo melitettsü sudi. Anungji kodaser mungdangji melemsai longjema ayutsü ibaji züngsem ajunga nukjidong asütsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

AO OSHI ANGAZÜKDAK:

TANÜ ANGAZÜKTSÜBA OJANG



Tebutsü

(n) pa kinungtsü (his wife)

* Okola tebutüsü temeim aketba kinungtsü lir.

Techanu

(n) shiruru tila, tain maküm (young animals)

* Ozü kidang ak aser an techanu aika lir.

OLONG PAITEP # 7049

16x16 crossword grid with numbers 1-16 indicating starting positions.

TIPILEN

- 2. Auonung chiyongtsü asenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüing
3. Tenarong maten
4. A _ _ _ g
6. Mopung apodoka
9. Tongtipang tagitsü
10. Menungra bilem
11. Aiür
13. S _ _ _ k
14. T _ _ _ r

OLONG PAITEP # 7048 TELANGZÜBA

TIPILEN :

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem,
15. Tambu, 16. Khuret,
17. Sang.

LANGTSÜNGLEN :

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok,
12. Amang, 14. Jala.



ASÜNGDANGBA AJAK ALOKBAI LANGZÜMAR :

- Asüngdangber : Meimchir tenzükba telokji shirnok ?
Alokba : Taremzük o jembirtem ya lir .
Asüngdangber : Akidangbo alu nungsa mesen ala, saka tanüasungbo alu mayimerji koba nung mesen alar aser aji shirnok ?
Alokba : Department ajak nung mesen alar aser itemji pen ya lir, pen yagi rongsen ajunga chimar.
Asüngdangber : Teyangluba waraji kechi ?
Alokba : Tanü asüng sadiba wara ya Koda !
Asüngdangber : Ken rongnung tia makatiba tekongji koba ?
Alokba : Tekong asembuba ya lir, kechiaser Ken kar nung Tekong pezü lira asemji toktsür pezüjiang atener.
Asüngdangber : Süra Alokba paji (time) rongnung tia takatibaji koba ?
Alokba : Ka paji ya lir, kechiaser sadir ajungai ka paji nungdang sadir.
Asüngdangber : Teti pela jokdenadang alibaji shiba ?
Alokba : Mi yagi Alima ajunga rongaka pelar aser jokdener.
Asüngdangber : Ano Alima mesenji shirnok ?
Alokba : Rakzükraaktertem ya adi!
Asüngdangber : Ki kata mezütoki aibaji shiba ?
Alokba : Sen yagi ki kata mezütoker aser yangkhu ajungai aier.
Asüngdangber : Tatem nung süra Arogo mesenja shirnok ???
Alokba : Ochi mashi tenzükertemji adi!!!
Asüngdangber : O Alokba ojanga !!!!!

- Lilir : I. Kilang, Ajem, Indisen, Dimapur.

Howly, Barpeta, Hajo & Guwahati national highway yanglutsü

Guwahati, January 28, 2025 (Agencies): Centre sorkari Howly, Barpeta, Hajo, aser Guwahati sendaktepba national highway tasen ka yanglutsü agizükogo ta Assam Chief Minister Himanta Biswa Sarma-i ashi.

CM Sarma-i Barpeta District nung Howly nung aliba Raas Temple semdanga liasü. Idakji pai Lord Krishna nem tetushi agütsü aser management committee den senden ka amen.

Taoba mapang Raas Temple nung Raas Mahotsav nung adentsü atema CM Sarma jaoka liasü saka pa jelia sentong kar renema aliba ajanga medentetsüsa aküm. Iba melena pai tanü Kokrajhar nungi Guwahati-i aodang semdanga liasü.

Temple management züingsemtem den sensaksemdang infrastructural support mepishia liasü aser ibaji CM Dr. Sarma-i yaritsü nangzük.

Kümshia Raas Mahotsav amongtsü atema centenary building ka yanglutsü sentong renemtsü paisa ashi. Assam sorkari sobaliba senmang wazüka ayutsü temulung agütsür ta Sarma-isa ashi.

Chief Minister Sarma-isa Howly, Barpeta town, Hajo, aser Guwahati sendaktepa national highway tasen ka yanglutsü Centre sorkari agizükba osang lemsatep.

State sorkari taruba küm ka tsüingda nisung 40,000-50,000 tashi mapa nung anioxtsü sentong lir. February mesüra March nung Assam Direct Recruitment Examination (ADRE) results metetdaksütsü aser iba ajanga mapa inyaksü maongkatem angutsü ta CM Sarma-isa metetdaksü.

Higher Secondary examinations tembangba sülen Panchayat elections tenzüktsü aser kaketshirtem nem timtem magütsütsü ta paisa shisem.

"Assam nung Uniform Civil Code (UCC) anema noktaker mali anungji kin mesüra telok tenüing menüktsüba anentsüla. Tanü Muslim nungeri kinungtsü aika agiba anenogo" ta Sarma-isa ashi.

Barpeta Protected Area Bill ozüing kümogo aser President nungi temelaba dang atar. Iba bill ajanga environmental aser heritage conservation nung tongti shilem agitsü ta pai ashi.

Gauhati HC-i Umrangso nakmati atuba ken o angar

Guwahati, January 28, 2025 (Agencies): Umrangso nung ozüing alema nakmati atuba ken o Gauhati High Court-i agizükogo aser iba ajanga sorkari iba mapa inyadaksüba atema tasüingdangba kar adokogo.

Supreme Court-i rat-hole mining noktangtsü tetuyuba agüja lir saka Assam nung iba mapa maneni inyaker.

PELABA LEMSATEPER



TASOBA: 24-03-1942 - TASÜBA: 30-12-2024

Onoki teti meima aliba ojala Asür LADONGKALA (Merangkong) ajungben iba lima tokstür aoba mapang ozü asükhu nung lemsateptsü asoshi shirnoki ariabilem den, rongsen nübu, shisatsü aser sarasatem ajanga ozü mulung zürep süngzükdaksüogogo, nenok ajak dang kanga sa pelaba metetdaksür.

Talisa tembartem, kiyonger, yimer aser yimtsür, Merangkongtsür Telongjem Kohima, Kohima Kangtsüing Senso Telongjem, Merangkong Senso Telongjem Kohima, Kohima Ao Baptist arogo (KABA) aser Merangkong Town Baptist Arogo, nenok ajak dang pelaba lemsateper. Tsüingremi nenok ajak maneni moajang ta aji ozü sarasatem.

- Temeim Chirnur, Semchir, Anük-aku aser Kinüngertem

PELABA LEMSATEPER

January 3, 2025 anepdang züingia Settsü yimdak tsürabur, Mrs. Zülutemla'er ki arongba lendong tulu ajurua liasü aser iba dak sendakba maparen ajak nung kija-kibongtem, tembartem, kiyonger, Arogo aser lokti tentetemi lenmang balala ajanga yariba asoshi tsürabur Zülutemla aser kinüngertemi nenok ajak dang pelaba lemsateper.

Tongtibangsa asen 26th Aonglenden A/C MLA, Shri. Sharingain Longkumer Honorable Speaker (NLA) dang kangasa pelaba lemsateper, iba denji külemi lokti balala kar tenüing teta pelaba lemsateper.

- 1. Settsü Village Council
2. Ungma Village Council
3. Settsü Baptist Church
4. Longkhum Baptist Church
5. Sumi Settsü Baptist Church
6. Narotekong Baptist Fellowship
7. Liden Baptist Fellowship
8. Settsü Watsü Telongjem
9. Ongpangkong Watsü Telongjem
10. Siloam Healing Center, Tekongpang Ungma
11. Miracle Home, Ungma
12. Hope SHG, Settsü
13. Berem SHG, Settsü
14. Tzübi SHG, Settsü
15. Tongpanglar SHG, Settsü
16. Kinüngertem, Changtongya Village
17. Lt. Senanungba aser Watilla chirnur aser semchirtem
18. Tir Yimyim
19. Fire & Emergency Service, Mokokchung

-Mrs. Zülutemla & Kinüngertem

Mi senoktsüba atema nisung 3 apu

Imphal, January 28, 2025

(Agencies): Heingang police station kübok Mantripukhri nung Assam Rifles tesepe anasa ki asem rongdoktsüba atema Manipur police-i nisung asem puogo. Par asem rongnung tanur ka densema lir.

Hombarnep Imphal East District nung alir Rajkumar Mahesh (50), aser Maibam Ishwar Raj (30) na apu ta police-i ashi. Deobar aonung 6:00 ako meta Mantripukhri nung mi senoktsüba dak

sendakba nung tena apu. Tena lenisüba kübok iba tesem nung ki tazüing asem nung mi senokja liasü.

Iba lendong atalokba sülen Manipur Fire Services, Imphal, Assam Rifles personnel, Heingang police aser Mantripukhri nung alirtemi mi ensepa liasü.

Kitsükkirong lendong nung sen lakh aika indang rongsen rongdokogogo aser police-i ken o ka benoker bushisüingdanga arudar.

Chief Justice-i aniba Division Bench kati Assam State sorkar dang ketdangsurtemi Supreme Court tenokdangba mapa küma meinyaktetba atema asüingdangogogo. Iba tenokdangba sülen anidaksüla kechiyong rat-hole mining den environmental aser safety risks keta lir ta Division Bench-i ashi. February 7 nü iba ken o angadandang state sorkari affidavit ka nung osang tejangja agütsütsü tetuyuba agütsü. Umrangso region nung ozüing alema nakmati atuba osangtem angashiba sülen iba ken o adoka liasü. Supreme Court-i tesüiba nung rat-hole mining ya ozüing alema inyakba mapa ka ta sangdonga lir.

75 BUBA JANGPETKONG SENSO MUNGDAW



INTI SENDEN NÜKJIDONG : TELONGJEM ASER TEYARITEP

Tesentepdak : Molungyimsen
Anogo : 30-31 Aenjeti (January) 2025

Mungdaw Meraketsür:
Wb. Temjenmenba Hon'ble Advisor
Transport and Technical Education, Govt. of Nagaland
Wb. Marsanen Imsong
Tir, Ao Senden

Tongti O Jembir:
Wb. Lipokmar Tzudir
Music Luminary & Former NEZCC Director

KETDANGPURTEM

- Tir : Wb. Purtoshi, Dibuia
- Tatong Tir : Wb. Limasunep, Molungkimong
- Tongti Zülur : Wb. Chubatemu, Mongchen
- Repsem Zülur : Wb. Meyaliba, Waromung
- Sen Zülur : Wb. Punasangba, Yimjenkimong
- Sen Repsem Zülur : Wb. Chubayanger, Waromung
- Kimen : Wb. Nikensangba, Waromung
- Advisor : Wb. N. Toshi Tzudir

SENTONG - I ANOGO : 30/01/2025 MAPANG : 6:00 PM

- Sentong Lenir : Wb. Moanungsang Jamir
- 1. Sarasademsü : Rev. Moaliba Pastor Molungkimong Baptist Arogo
- 2. Metetpela Mapang : Wb. Limasunep Tatong Tir, JSM
- 3. Tir O : Wb. Purtoshi Tir, JSM
- 4. JSM Anthem : Arogo Choir
- 5. Pelaa Agizükba : Wb. Lanuyanger Chairman Molungyimsen Village Council
- 6. Aoer Tebuti O : Wb. Marsanen Imsong Tir, Ao Senden
- 7. Sobaliba Ken : Kohima Jangpetkong Senso Telongjem
- 8. Onük : "Zünyanga Aliba Lokti"
- Tejembir : Wb. Lipokmar Tzudir Music Luminary & Former NEZCC Director
- 9. Tatam sarasadem : Wb. Lusanen Imsong Pastor, Luyong Baptist Arogo

SENTONG - II ANOGO : 31/01/2025 MAPANG : 9:00 A.M

- Menden : Ketdangpurtem
- 1. Sarasademtsü : Rev. Tajung Pastor, Molungyimsen Baptist Arogo
- 2. Ni Ya shinur : Wb. Chuba Ozükum Convenor Global Naga Forum & Former President Naga Hoho
- 3. Sobaliba Ken : Dibuia Putu Menden
- 4. Tsükong Ronem :
- 5. Tsükong Nükrangtong : Wb. Temjenmenba Hon'ble Advisor Transport and Technical Education Government of Nagaland
- 6. Osangtem Agitsü :
 - a. General Osang
 - b. Audit Osang
 - c. JSM Multipurpose Complex Mangkolemba
 - d. Temzüng Luden
- 7. O Lemtepba Mapang :
- 8. Nungtet Luden Osang :
- 9. Menden Tatem O :
- 10. Tatem Sarasadem :

TEMETETSÜ

1. Tarur ajak Molungyimsen yimtsüngi tanendak aser chiongtsü peria agütsütsü
2. Agenda ajak 30th January 2025, 4:00 PM tashi nung JSM ketdangpur ket tongtsütsüla.
3. Yimtsüng aser town unit ajak wako (Flag) anana bener arutsü.
4. Mungdaw mapang nungdak ajak Molungyimsen Putu Mendeni anepalutsü.
5. Yimtsüng aser Town Unit nebu telemsa yamai alitsü.
 - a. Changki - 15 k. Mokokchung Town- 15
 - b. Chungliyimsen - 10 l. Kohima - 15
 - c. Khar - 15 m. Dimapur - 15
 - d. Mongchen - 10 n. Diphupar - 7
 - e. Dibuia - 12 o. Tuensang - 5
 - f. Waromung - 15 p. Mon - 5
 - g. Yimjenkimong - 12 q. Tuli - 5
 - h. Molungkimong - 15 r. Tsüdikong - 5
 - i. Luyong - 10 s. JKTM - 5
 - j. Alongkima - 7 t. Jangpetkong Tetsür - 5
 - k. Mangkolemba - 10 Telongjem - 5

Russia nunger ketdangsür tejen kati Syria semdangtsü

Damascus, Aenjeti/January 28 (Agencies): Russia Deputy Foreign Minister Mikhail Bogdanov-i iba hopta Damascus nung Syria nunger yimsüsür tasentem den ajuruteptsü, ta Syria nunger source anati Mongolbarnü ashi.

Moscow tembar tir Bashar al-Assad atsüngtokba sülen tang mezüngbuba Russia nunger ketdangsür kati Syria semdangtsü.

Syria nunger source yagi, Bogdanov-i linük semdanga senden amentsüa aliba mesüra pai anogo kwi atema semdangtsü iba indang osang tejangja magütsü. Kasa mapang nung Russia nunger ketdangsürtemia osang kecha magütsü.

Russia ya küm aika Assad tembar liasü, aser 2011 küm pa yimsüsüba anema longkak aiba

tashiyim agi azüokba sülen küm ter dak tema pa anemertem den raraba mapang Russia-i teyari agüja tesem aika meyipa agia liasü.

Ajisüaka taoba küm Assad anemertemi kanga kara tesem aika atsünga aoba sülen pa atsüngtok aser Assad December ita Damascus toktsür jena ao. Pa mezüng northern Syria nung Russia-i achaayangba Hmeimim Air Base-i ao aser iba sülen Moscow-i jena oa liasü.

Iba tatalokba sülen anogo ishika lir Bogdanov-i, Russia aser Islamist telungpur telok Hayat Tahrir al-Sham na tesendaktep kanga junga odar ta ashiba Russia indang Interfax news agency-i metetdakja liasü. Hayat Tahrir al-Sham puri anir Assad atsüngtoka liasü.

Bogdanov-i ashiba agi, Syria

nung Russia nunger base ana parnoki maneni achaayangtsü imlar. Syria kübok Tartous nung naval base ka aser Latakia yimti anasa Hmeimim base Russia-i achaayangdar.

Ajisüaka iba ita Syria nung administration tasenbai, Tartous port achaayangtsü atema Russia nunger indang firm STG Stroytransgaz den tenangzüktepa yanglur aliba thija liasü, ta Syria nunger shishilembar asem aser media sangdong balala ajanga metetdakja liasü.

Iba tenangzüktepa ya Assad mapang yanglua liasü.

Syria indang interim defence minister, Murhaf Abu Qasra-i iba ita Damascus nung interview ka agiba mapang Reuters dang ashiba agi, linük ana tsüngda tesendaktep asoshi Russia den tang sensak tesemdak lir.

Serbia PM Milos Vucevic-i mapa toktsüogo

Belgrade, Aenjeti/January 28 (Agencies): Railway station canopy ka chirepba dak sendakba nung linük ajunga nung nüburtemi longkak aitba sülen Serbia Ato Kilonser Milos Vucevic-i mapa toktsüogo.

Ken o tebenjaba mekümdaktsütsü aser lokti mepetmesü nungi pila toktsütsü atema pai iba telemtetba agiogo, ta Vucevic-i ashi.

Taoba küm November ita Serbia nung yimti tulutiba rongnung tanabuba Novi Sad nung railway station ka nung concrete canopy ka chirepba sülen nisung 15 asü.

Iba tatalokba sülen linük ajunga nung nüburtemi longkak aita liasü. Iba sülen nisung meyirejang aikati iba tesem chirepba kuli tejangja agütsütsü khanga yimtung nung longkak aitba den ochi mashi inyakyim

sendaka aliba aser construction project tem junga reprangshima meyangludaktsüba atema longkak aita liasü.

Novi Sad nung tatalokba dak sendakba nung taoba Transport Minister Goran Vesic densema nisung aika aitsüogo. Iba tatalokba sülen anogo ishika lir Vesic-i mapa tokja liasü.

Longkak aitba sentong ya kaketshirtem anir agia arudar aser prnoki anogoshia gari nokdangba den ita aika university tem nokdanga liasü.

Taoba Hokolbarnü longkak aitba sentong ka ayongzükba telangzüba agüja Serbia nunger aika mapai mao. December ita-a Belgrade nung longkak aitba sentong nung nisung 100,000 shi-i shilem agia liasü. Iba sülen jila aser yimti balala nung nüburtemi maneni longka aita aruogo.

Ajisüaka Hombarnü Serbia yimtiba Belgrade nung ajak dang mazüngtiba lenmang ka ghonda 24 nokdanga ayuba mapang tetsür kaketshir ka yiruba sülen tensa tamajungba aküm. Opposition aser ruling party pusemertem tsüngda mangatettep adokba sülen tetsürla ya yirua liasü.

Kasa anogo nikongtsütsü Serbia tir Aleksandar Vucic-i, pai longkak aitba dak sendakba nung kaketshirtem aser university tutors tem shirnok aija lir, parnok nem taitok agütsütsü ta shia liasü.

Vucevic, shiba Serbian Progressive Party lenir lir, pa küm ka majung dang inyaka liasü.

Pa taoba mapang minister of defence aser 2012 nungi 2020 tashi Novi Sad indang Mayor liasü.

Goma nung rara tesashiba akumer, tasü mang jenti yimtung nung lir

Goma, Aenjeti/January 28 (Agencies): M23 fighters aser Congolese government forces tsünta Democratic Republic of the Congo (DRC) anüdoklen Goma yimti nung kanga sashia raraba ajanga nisung tasü mang jenti yimtung nung lir aser mozüki tem nung yaritsü mokoki akumer.

Rwanda-i yarir ta United Nations-i ashiba sorkar anemer temi Hombarnü Goma yimti tiyongi ait aser iba yimti ya par küboki aiter ta sangdonga Congolese army asoshi takoksa tulu agütsü aser tensa tali tamajungba kumogo, kong küm aika raraba ajanga nisung noklang aika tepseter ano million aika tesem balala nung jenoka lir.

DRC indang Rural Development Minister Muhindo Nzangi-i ashiba agi, Congolese army-i Goma shilem 80 amokbanga lir aser Rwanda sepaitem ya yimti tezülen

mesüra arütsü alemer oa lir.

Mongulbarnü osangbener senden ka nung UN aser danga aid agency temi Goma nung mozüki tem agi asü-amar aser yirur alirtem masemer aser nisung noklang aika injang, mortar aser shrapnel agi yirur anepalur aser tasü mang aika yimtung nung lir ta ashi.

"Tang mozüki nung nisung noklang aika lir, aser parnok timba prangbong agi yiruba lir," ta WHO indang emergency response coordinator for the DRC, Adelheid Marschang-i ashi.

Hombarnü Goma nung nisung 17 tepset aser ano yimti nung aliba doctor temia nisung 367 yirur temang anepaluba mapang lir ta ashi. Civil society züngsemtem aser Goma nung aliba NGOs temi nisung 25 asü aser 375 yiru ta ashir.

Hombarnü Save the Children in DRC atema country

director Greg Ramm-i ashiba agi, kiyong kar süngjema lir ta onoki osang angazük, saka minute ishika lir injang tulu khaloktsüba osang angashi.

Yimtung tem nung prangbong tulu-tila aser mortar maneni khaloktsür, kong tasü mang aika tenük agi nguogo, ta UN humanitarian office atema odongtar Jens Laerke-ia osangbener senden ka nung ashi.

Kasa mapang World Food Programme ajanga ashiba agi, Goma telung aser temeket nung chiyongtsü teyari agütsüba maparen khen atema anena lir aser chiyongtsü agi anüngtsü tebilemstü lir.

Mongulbarnü South Africa-ia par sepaia asem Hombarnü telok ana khatapba tetsüngta nung asü ta ashi. Ano sepaia ka tawa khatapba nung asü, anungji taoba hopta asür ajak agi 13 ajunger, ta ashi.

(Maneni tapak 8 nung...)

Nagaland CM-i Nagaland Super League tenzüksüogo



Dimapur, Aenjeti/January 28 (TYO): Mapang talangka nungi yongya aliba Nagaland Super League Mongolbarnü Nagaland Chief Minister Rio-i Chümoukidema football stadium, police complex nung tenzüksüogo.

Mezüngbuba NSL ya Nagaland Olympic Association aser Nagaland Football Association na den longjemer ayongzükogo. Taküm iba asayamung nung team tenet toktepa angutsü.

Team balala tem asaya ya IG stadium stadium Kohima aser Chümoukidema football stadium nung asayatsü. Iba asayamung nung ajak senteper senpet sen crore 1 agütsütsü kong asaya shia man of the match nem sen 10,000 agütsütsüba densema lir. Maneni league tatemi Golden Glove, Best goalkeeper, Player of the league, Best young player amala award balala agütsütsü.

Team shia nung asayar 30 alitsü aser item asayartem rongnungi 24 bo Naga nung asütsüla. Asayartem rongnung bendanger asayar trok alitsü.

Starting 11 nung tanga state nungi aruba asayar asem asayatetsü.

Grassroots jenjang nung asayartem ajungkettsü nükjidong nung team shia nung under 20 asayar trokbosa alitsüla aser starting eleven nung under 20 asayar anabosa alitsü nüngdaker. Under 20 asayar ajak kechi südir süaka pezübenbosa tetenzük nungi asayatsüla.

Asayamung lapokba sentong nung alakteta jaoker CM Rio-i, otsüsütsa mezüngbuba Nagaland Super league lapokba sentong nung pa densemba atema kanga pelaba lemsatepa den state tenüng nung Naga nung ajak aser asayamung nung shilem agirtem nem tenüngsang agütsü. Paisa, state sorkari senotsü teyari agüja Nagaland Olympic association aser Nagaland football association den longjemer iba asayamung ayongzükba atema asayamung ayongba committee nem tenüngsang agütsü. CM-isa, All India Football Federation tir Kalyan Chowbe-i mapang

agütsüteta aruba atema kanga pelaba lemsatepa liasü.

Rio-i, asayartem dang ranlokger asayatsü, yimayimpong azüoktsü aser temaba jenjang tongtettsü atema temulungtetba tulu yur bendanga asayatsü ajungshia liasü.

Sentong nungsa AIFF tir Kalyan-i, league tenzüksü atema Nagaland sorkari senotsü teyari agütsüba atema kanga pelaba lemsatep. Paisa, asayamung nung senpet sen crore 1 agütsütsü lateta aliba angashia kanga pelaba lemsatepa den state kar nungobo league tem iba sen yagi ang achaayanger, ta ashi.

Maneni pai Nagaland Super ajanga lanur aika nem temelenshi bener aruja Naga nung lanurtem iba ajanga aayanga pei kibong mesütetsü imlaba lemsatepa den item asayartem yagisa state nem konang tetushi bener arutsütsü aser India tenüng nungi asayatsü imla ataba lemsatep.

Iba asayamung ya January 28 nungi March 31 Tashi asayatsü.

Neymar aser Al-Hilal na tangatettep nung pilaogo



Aenjeti/January 28, 2024 (Agencies): Saudi Pro League club Al-Hilal den tangatettep nung pilaba sülen Brazil club Santos puri Neymar den tanaben tenangzüktepa yanglutsü merangdar.

Arishi küm 32 tain Brazil nung international asayar yagi club den mapang tatsüka atema tenangzüktepa yanglutsü imlar, kong pa career tenzük liasü.

Al-Hilal den tenangzüktepa yanglur aliba aginba ya jenjang tulu ka agiba lir, ta Neymar den sendaktepa aliba source kati ashi.

Pa 2023 küm August ita

pound million 77.6 yong iba club nung adenba sülen yiruba ajanga masayateti tenetben dang asaya liasü.

Pa tang asaya aliba season nung anaben asayaogo aser tatemsa November ita substitute ama khen asayaogo.

“Neymar-i Al-Hilal asoshi kechi inyaktüsügo, iba asoshi pa dang kanga pelar aser pa career takok nung aotsü imlaja atar,” ta Al Hilal-i ashi.

Major League Soccer club Chicago Fire-ia, Neymar United States-i anir aotsü merangogo, saka pai Santos-i meyipa aotsüang telemtepa agia liasü.

Inter Miami-ia, pa taoba mapang Barca nung külem asayar Lionel Messi aser Luis Suarez na den longjemdaksütsü merangogo.

2017 küm Paris St-Germain puri pound million 200 agi alizükba sülen Neymar ya tang tashi alima nung sen tasaktiba agi alizükba asayar lir.

Al-Hilal den küm ana atema tenangzüktepa yanglur pa ano ita tenet shi asayatsü anunga lir aser küm nung pa taa euro million 150 liasü.

Otsü tasen ka yanglutsü tejangraba nung pa iba club nung aden saka 2023 küm Ocober ita Brazil team Uruguay den World Cup qualifier asayaba mapang anterior cruciate ligament yiruba sülen pa mapang talangka masayateti liasü.

Pa taoba küm October ita nungi asaya tenzük saka ano asaya tanabuba nung hamstring yiruba sülen tang tashi khen danga asaya mali.

U-19 Women’s T20 WC nung Trisha-i mezüngbuba century yanglur

Aenjeti/January 28, 2025 (Agencies): India tsür Trisha Gongadi-i Mongolbarnü otsü tasen ka yanglua Women’s T20 World Cup nung century ka yangluba mezüngbuba asayar kümogo. Lai iba asayamung Super Six round stage nung Scotland den asayaba mapang iba otsü tasen yanglua liasü.



Trisha-i over 18buba nung ball 53 nung iba alizüng ya tongteta liasü. Taoba mapang England tsür Grace Scrivens-i run (93) timtiba yanglur liasü. Lai 2023 küm January ita Potchefstroom nung Ireland den asayaba mapang iba run yanglua liasü.

Trisha-i iba asaya nung ball 59 nung out mesüi run 110 yanglua liasü. Lai four 13 aser six pezü züka liasü.

La nem külem opener wicketkeeper Kamalini G (ball 42 nung run 51) aser Sanika Chalke (ball 20 nung run 29 n.o) nati teyari tulu agüja India team-i over 20 nung wicket 1 out sür

run 208 yanglu. Run arishiba mapang Scotland team-i over 14 nung asayar ajak out sür run 58 dang yangluteta liasü.

Scotland team nungi asayartem rongnungi opener Pippa Kelly (12) aser Emma Walsingham (12) nati run timba yanglua liasü.

India tsür bowler tem rongnung left-arm orthodox spinner Ayushi Shukla-i ball kanga junga ona lai run 8 agütsür wicket 4 agi aser Vaishnavi Sharma (3/5) o Trisha (3/6) natia ball kanga junga onogo.

BENDANGLI OSANG : Tapak 7 nungi...

Goma nung rara tesashiba akumer...

Iba rara ajanga nisung meyirijang aika Goma nungi jena ao, koba pei ki yutsür tesem balala nung jenoka alirtem nem humanitarian aid agütsüba tesem tongtipang ka liasü. Taoba küm DRC anüdoklen nisung million asem pei ki yutsür tesem balala nung jenshia aliba den külemi taküm küm tenzükeria rara mechi nisung meyirijang aika jena ogo.

“Iba yimti asangsang nunga timtem nung lir, aser taonung melaora anogo ishika tsüngta laotsü. Rwanda-i nok-nü yutsütsüla, tesüngjem lidaktsütsüla aser jembishinü tenzükshitsüla,” ta French Foreign Minister Jean-Noel Barrot-i Sud Radio dang ashi.

Centra Goma nung alir kati, “Ni nikongdang tensa koma lir ta reprangtsü atema kimai ayazüka alu. Sepaitem Rwandan uniforms tasen semer ni angü,” ta ashi.

Goma anasa border crossing ka nung Congolese aser Rwandan sepaitem tsüngta khatepa osanga lir. Rwandan arütsülen aliba Gisenyi jila tezülen civilian pongu tepset aser 25 kanga sashia yiru, ta Rwanda mitkari osangbener dang Hombarnü ashi.

M23 mesüra March 23 Movement ya DRC anüdoklen telungpur telok noklang aika

aliba rongnung ka lir aser parnoki ali rongsen talubosa aliba tesem amokbangtsü meranger.

Iba telok nungya Tutsi fighter dena lir aser parnok ya DRC indang minority Tutsi nütüng temeden asoshi rarar ta ashir. DRC (FARDC) armed forces nung mejungi amshir ta ashishia iba telok ya 2012 küm temai adok.

2012 küm M23 yagi mezüng Goma ya rakzük, saka UN sepaitem teyari nung Congolese army temi 2013 küm Rwanda den arütsüa aliba anüdoklen tenemleni yoka liasü.

DRC anüdoklen ali rongsen peria aliba tesemtem amokbangtsü mechi Tir Paul Kagame lenisüba kübok Rwanda-i M23 nem sepa aser noknü teyari agütsür ta DRC sorkar aser UN-i aitsür.

Rwanda-i iba taitsüba magizüker aser DRC-i Democratic Forces for the Liberation of Rwanda züngsemtem anioker ta ashir. Democratic Forces for the Liberation of Rwanda ya Kagame anemba telok ka lir, koba 1994 Rwandan genocide nung poktet.

Rara tesashiba akumba ajanga African Union indang Peace and Security Council iba ken o jembitsü Mongolbarnü meilongi senden ka amentsü lir.

BILEMDANGANG

“Anogoshia tenüngsang agüja tenzükang.”